

- भारत अर पाकिस्तान बीचे लड़ाई रुकी-विदेश सचिव विक्रम मिसरी खबरनवीसां ने आ जाणकारी दीनीं
- लड़ाई रुकण ऊं पैली भारत-पाक बीचे तणा-तणी बीचे मुख्यमंत्री भजन लाल शर्मा सगळी पार्टियां रा नुमाइंदा सागे मीटिंग कीनी-कह्यो-प्रदेश हर भांत रा हालात रो सामो करण सारु तैयारं
- उपमुख्यमंत्री अर महिला अर बाल विकास मंत्री दीया कुमारी पोषाहार वितरण रा बारा मांय मिलण वाळी शिकायतां रो साफगोई सागे निपटारो करण रा हुकम दीनां
- जयपुर, भरतपुर, उदयपुर अर कोटा संभाग मांय कठे-कठे आंधी चालण अर बारिश व्हेवण रा आसार-आवता पांच दिन ताई गर्मी ऊं साता रेहवेलां

000

भारत अर पाकिस्तान बीच फौजी कार्यवाही रोकण माथे सहमति बण गयी हैं विदेश सचिव विक्रम मिसरी आज सिंज्यां खबरनवीसां ने आ जाणकारी दीनीं वे बतायो के दोन्यू देशां बीचे आज सिंज्यां 5 बज्यां ऊं फौजी कार्यवाही रोकण री सहमति बण गयीं

.....
पाकिस्तान रा डायरेक्टर जनरल ऑफ मिलिट्री ऑपरेशन्स फोन कर र भारत रा डीजीएमओ ऊं ई बारा मांय बातचीत कीनीं ई पाछे फौजी कार्यवाही तुरत रोकण रो फैसलो करी ज्यों सहमति रे मुजब दोन्यू पक्षां बीचे जमीन, हवा अर समुद्र मांय हर भांत री गोलाबारी अर फौजी कार्रवाई बंद रेहवेलां विदेश मंत्री एस. जयशंकर सोशल मीडिया पोस्ट रे जरिये भारत-पाक बीचे फौजी कार्यवाही रोकण री पुष्टि कीनी, हालांकि वे मांड्यो के भारत री आतंक रे खिलाफ लड़ाई चालती रेहवेलां

0000

प्रधानमंत्री नरेन्द्र मोदी आज लड़ाई रुकण ऊं पैली नई दिल्ली मांय वां रा रहवास माथे रक्षा मंत्री राजनाथ सिंह अर फौज रा तीन्यू अंगां रा मुखियां सागे मीटिंग कीनीं मीटिंग मांय राष्ट्रीय सुरक्षा सलाहकार अजीत डोभाल ई मौजूद रह्यां पाकिस्तान सागे तणा-तणी रा हालात बीचे भारत रा सशस्त्र बल पाकिस्तान री लगातार बधती भड़कावण वाळी कार्रवाइयां रो सटीक जवाब दीनां फौज कानी ऊं चलाया जा रह्या ऑपरेशन सिंदूर रा बारा मांय नई दिल्ली मांय राख्यी ज्यी प्रेस वार्ता मांय अब ऊं थोडी देर पैली कर्नल सोफिया कुरैशी बतायो के पाकिस्तान री ओर ऊं करी ज्या केई दावा झूठा हैं

.....
मुख्यमंत्री भजन लाल शर्मा री सदारत मांय आज सगळी पार्टियां री मीटिंग राख्यी ज्यीं मीटिंग मांय मुख्यमंत्री कह्यो के प्रदेश हर भांत रा हालात रो सामो करण सारु तैयार हैं श्री शर्मा कह्यो के आपात हालात मांय काम आवण सारु आवण-जावण, दवाइयां अर खाण-पीण रा सामान समेत सगळा जरूरी कामां सारु सरहदी जिलां ने रिवॉल्विंग फण्ड मुहैया करायी ज्यो हैं मुख्यमंत्री सगळी पार्टियां रा नेतावां ऊं एकजुटता अर तालमेल राखण री अपील कीनीं मीटिंग पाछे उपमुख्यमंत्री प्रेमचन्द बैरवा खबरनवीसां ने बतायो के तनाव रा हालात रो सामो सगळां ने मिल र एकजुटता सागे करणो व्हेलां

विधानसभा मांय विपक्ष रा नेता टीकाराम जूली कह्यो के पूरो देश फौज सागे हैं वे ई मुद्दा माथे सरकार री पूरी मदद रो भरोसो दिरायों

00000

जयपुर पुलिस कमिश्नरेट मांय चौबीस घंटा काम करण वालो जय हिन्द नियंत्रण कक्ष बनायी ज्यो हैं पुलिस कमिश्नर बीजू जार्ज जोसफ बतायो के मौजूदा हालात मांय जनता फोन कॉल, मैसेज, फोटो अर वीडियो रे जरिये आतंकी वारदातां अर अफवाहां ऊं जुड़ी जाणकारियां रा बारा मांय हेल्पलाईन नंबर 0141-2366683 अर व्हाट्सएप नंबर 9530422612 माथे संपर्क कर सके हैं

000

उपमुख्यमंत्री अर महिला अर बाल विकास मंत्री दीया कुमारी प्रदेश मांय पोषाहार वितरण रा बारा मांय मिलण वाली शिकायतां रो साफगोई सागे निपटारों करण बाबत् कह्यो हैं वे आज जयपुर मांय महिला अर बाल विकास विभाग रा अहलकारां सागे राख्यी ज्यी मीटिंग मांय बोल रही हीं दीया कुमारी अहलकारां ने खुद सेवक समूहां री महिलावां ने काम-धंधा रा बत्ता ऊं बत्ता मौका मुहैया करावण रा हुकम दीनां

00000

जयपुर, भरतपुर, उदयपुर अर कोटा संभाग मांय कटे-कटे आंधी चालण अर गरज सागे बिरखा रा आसार हैं जोधपुर अर बीकानेर संभाग मांय ई कटे-कटे हल्की बरसात री संभावना हैं मौसम विभाग रे मुजब राज्य रा केई हलका मांय आवता दो-तीन दिन ताई बिरखा व्हेवण अर जोरदार बायरो बाजण रा आसार हैं

0000